

յին , և յառաջագոյն գրեցաւ Աբղ և Իւժ առ Տէրութիւնն , եւ այժմ ոչ կարեմ սահմանել նորոգոյն ինչ ('ի 21 Սեպտեմբերի) : Լատինք ոչ խրատու Դատաւորին անսային և ոչ զալստեան հրամանին համբերէին . արգելին զաւել ածեւն Հայոց յԱյրին Ծննդեան , զոր սահմանեալ էին յաւուր բաժանորդութեան . և մինչ պատաղեալ էին Հայք զաղմկաւ սորա 'ի դատարանն , ժողովեալ նոցա զՖէլահս Բեթղեհէմի ստիպէին զնոսա բռնի անցանել 'ի վերայ սիւռոցացն Հայոց : Դատաւորք յորդորէին զՀայս թողուլ Լատինաց անցանել ժողովրդովք 'ի տեղովն անտի , լռել առ ժամանակ մի մինչեւ դադարիլ խառվութեան , խոնարհեցան Հայք 'ի բանս նոցա և ջանային հաշտիլ ընդ Լատինս , այլ նոքա ռիսացեալ 'ի սրտէ ոչ երբէք մերձենային , և առեալ զոմանս 'ի Դատաւորէն եւ 'ի Քաղաքապետէն գնացին 'ի Ս . Յարութիւն և խօսէին վասն սեան եւ խաչելութեան պատկերին , այլ Հայք ընդդէմ կացին , եւ մնաց խնդիրն որպէս և էրն : Եկին 'ի սոյն աւուրս յերուսաղէմ երկօքին Փոխանորդք նոցին՝ Կղեմէնթ 'ի Դամասկոսէ և ՅորաՄանուէլ յեգիպտոսէ , որ իբր բարեկամ էր Հայոց , բայց ոչ կարէին մերձենալ առ նոսա ըստ առաջնոյն յերկիւզէ միաբանաց նոցին :

Եւ զինի աւուրց ինչ յաւելին Լատինք և զայլ իմն խրժդրժութիւն (յ8 Նոյեմբերի) : Զի յերեկոյի կիւրակէի նըստեալ եկեղեցականացն Հայոց յեկեղեցւոյ ընթեռնուին զՅայսմաւուրն , ոմանք 'ի Լատինաց եկեալ ստիպէին զնոսա յառնել , զի եկեղեցականք նոցին հանդիսի ունէին անցանել անտի , և նոցա ցուցեալ զճանապարհն ասէին բաւական լինել նովաւ . սրտմոեալ ընդ այս Լատինաց՝ ժողովեցին անդ զՖէլահո և խախտեցին զժամերգութիւնն Հայոց և սկսան կազել ընդ նոսա : Եւ Փոխանորդ նոցին կորդեալ զսուր այլազգւոյ ուրուք Մէհեմէտ Շախտուր ասացեալ , որ դիպաւ անդ 'ի նմին ժամանակի՝ յարձակեցաւ 'ի վերայ Հայոց , և քաջալերէր զՖէլահսն և ասէր . հարէք մի երկնչիք , և խառնեցան երկօքին կողմն և հարկանէին զմիմեանս , եւ վիրաւորեալ Տիգրանակերտցի Յարութիւն վարդապետի անկաւ անդ , և Լատինաց տեսեալ զարիւնն՝ խոյս ետուն անտի՝ և ազդ արարին Տեսչի իւրեանց : Վիրա-